

Članovi Evropskog parlamenta, predstavnici Evropske komisije, nevladine organizacije i predstavnici građana su jučer, na konferenciji organizovanoj u Evropskom parlamentu, izrazili zabrinutost zbog zagađenja zraka na zapadnom Balkanu i pozvali na hitne akcije i provođenje mjera za smanjenje zagađenja, prenio je Manager.

Po rezultatima mjerenja koja su predstavljena na konferenciji, granične vrijednosti zagađenja PM česticama u neposrednoj blizini termoelektrane Tuzla je u periodu od 41 dana bilo prekoračeno 25 puta. U istom periodu odgovorne institucije nisu niti jednom reagirale i poduzele bilo kakve mjere kojima bi zaštitile stanovništvo od izloženosti zagađenju.

Mjerenja je, u periodu od oktobra 2016. do maja 2017, provela organizacija Bankwatch CEE, u saradnji s partnerima u lokalnim zajednicama u kojim su locirane termoelektrane u Bosni i Hercegovini, Srbiji, Crnoj Gori, Makedoniji, Bugarskoj i Rumuniji.

Na navedenom događaju su razmatrane mogućnosti uspostavljanja zajedničkih strateških pravaca za suočavanje s tim problemom na regionalnoj razini, kao i pomoći zemljama zapadnog Balkana da usklade standarde za kvalitet zraka sa evropskim.

Evropska komisija prepoznala je ovu situaciju kao vrlo uznemirujuću, a šef odjela za čist zrak pri Generalnom direktoratu za okolinu Francois Wakenhut rekao je da su koncentracije PM10 na zapadnom Balkanu u gornjem opsegu koncentracija ikad primjećenih u EU.

Dodao je da zagađenje prašinom ima poseban izazov zbog široke upotrebe lignita, mrkog uglja i biomase za grijanje ili proizvodnju električne energije, pa bi smanjivanje upotrebe uglja i njegova zamjena čistijim gorivom bio prvi korak ka čistijem zraku, priopćeno je iz udruženja Ekotim.

Izvor: ekapija